

Marco POLO, *La description du monde* (chapitre LXIX)

Le dieu des Tartares

LXIX. Cy devise du dieu des Tartars.

Sachiez que leur loy est telle que je vous diray. Car ils ont ung leur dieu que il apellent Nacygay et dient que il est dieux terriens qui garde leurs fames et leurs enfans et leurs bestez et leurs blez ; et lui font grant honneur et grant reverence, car chascun en tient ung en sa maison, et est fait de feutres et de dras et lui font sa fame et ses enfans. [La molier] lui mettent a senestre et les enfans sont touz si faiz comme il est. Et quant ilz menguent, si prennent de la char crasse et lui en oignent la bouche et a sa fame et a ses enfans. Et puis prennent du brouet de la char et l'espendent dehors la porte de la maison et dient que leur dieu et sa mesgnie a eu sa part de leur mangier. Ilz boivent lait de jument en telle maniere comme vin blanc et l'appellent guemis. Leurs vesteures sont le plus toutes de dras d'or et de dras de soye fourees de riches [pennes], sebelines et d'ermes et de vair et de goupiz moult richement. Et tous leurs harnoiz sont moult beaulx et de grant vaillance. Leurs armeures sont ars et flesches et espees et haches. Et des [ars] s'aydent plus que d'autre chose, car ilz sont trop bons archiers, les meilleurs que l'en sache ou monde. En leur dos portent armeures de cuir de bugle bouilly qui sont moult bons. Ilz sont moult bons hommes d'armes et vaillans en bataille et seuffrent durement plus que autres gens ; car mainteffoiz, quant ilz ont besoing, ilz iront ung moys sans porter nulle viande fors que ilz vivront de lait de jument et mangeront des chars que ilz chacent de leurs ars.